



Faut-ë crwêre quë dj'èsto d'djà byin malade po skèpyi dins-on-opëtal, lë djoû d'vant l' Noyé 1943. Mins non.na, nosse man avot d'djà yë one masse dë rûjes en 1939 avou l' pës vî d' mès frères. Elle avot d'mèré deûs djoûs ètîres dins lès maus. Èt, come dj'èsto bén là èvou qu' djë m' trovève, fénèyant d'vant l'eûre, djë m' fiève priyi po rèche. Pës quèstion dè ravèker cès djoûrnéyes-là à yèsse mau bèsoigniye : c'èst come ça qu' mès père èt mère m'ont fait v'në së tère dans one clènëque amon lès flaminds à Lovin. C'èstot co cètella qu'èstot l' pës près d' nosse maujone. Avou nosse vrai nom d'famële - Desmet - pës taurd on m' pëdrè pës

aujiyemint por on vrai flamind ! Ça, c'est po lès pondants èt lès djondants !

Cor one miète on m' lome « Noyé » ! Më marëne Maria, qu'a todë drëssî s' tchapelèt come on drapia, èl voléve à tote fwace. Më parén Jëlbêrt, lë, èl avot dët « Poqwè ni Jésus ? » Mins avou lë, ni moyén dè soyë së c'estot po rîre ou po braire. È n'avot ni pës chënard quë lë.

Èl avot falë qu' nosse pa, capon diâle, rëmousse dins l' tchambe po fé tchandji lès-ëdéyes dë mès deûs saîweûs.

« Vos èstoz dè l' boune anéye vos deûs, on va rire dë m' gamin po l' rëstant d' sès djoûs ! »

« Rire po Noyé, vos n' crwèyoz ni à Dië, ni à Diâle, vos ! Vos èstoz on-ome sins fwè ni lwè. »

Më, po m' fé ètinde dins l' forbatadje, dj'avo pëtë m' prëmëne râje. Faut crwêre qu'on m'a mau comprins. Nosse man m'a prësinté one tête. Come c'estot à m' gout dj'ënn'a rovi l' rim-ram.

One blanke moussîye sougnante avot d'mandé qu'on laiye nosse man së r'pwâser. A paurt më pa, èlle avot tchëssi tot l' monde à l'ëch. Nos n'èstîn' pës qu' nos trwès .

Lèye, maman, sôyiye è quate së s' lét èt quë n'avot co rén dët, avot tapé on-ouy pa l' fëniësse dë s' tchambe.

« Qwè yësse por on clotchi qu'on vwèt là, par en d'fou ? »

« C'est l' clotchi d' l'ëglîje Sint Jacques. » avot-ë rëspondë nosse pa.

« Bén, nos l' loumerans Jacques, don Maurice, mins në l'zi dëjz co rén asteûre. »...

Ël a bén manqué quë djë m' loume Noyé quand min.me , po fé plaijë à m' marëne, tiëstoûwe come on boc', sins-èfant, insëdon marëne dë sëke.

Avou lèye dj'alëve oyë po lontimps à coude ! Pëtëte nwêre méguèrlote, avou one loque à pouchêre dins sès mwins, èfoufïye come one poye qu'a pièrdë s'-t-ou, combén d' côp a-t-ë falë quë dj'èl rabrësse avou s' moustatche dë gendarme.

« Rabrëssiz vosse marëne Maria, vosse marëne dë sëke, donez li cor-on bètch !... »

Dj'a tchandji d' nom en 1945, quand lès amèrëquins ont passé pa nosse maujone së l' fën dè l' guêre : dëspôy adon, on m' lome Jacky.

Ë-n-a bén trwès këlomètes po-z-aler à scole gardiène adlé lès « Ma chère Soeur » Nosse man m'i min.ne à vélo tos lès djous. L'anéye quë vent nos-i vaîrans à pids avou m' frère Michel, 18 mwès pës djon.ne quë më. Po l' momint djë fais dës pëqu'tadjes èt dës trëllassadjes à m'-y-auje. Lë pës dêr, c'èst co dè causer è Françès come lë « Ma Soeûr ». Po comprinde, ça, ça va, mins po rësponde, ë m'arëve co pës sovint dè causer come on m' l'a aprins è nosse maujone. Èt pwis, on sët mia ç' qu'on vout dîre è walon. L'ôte djoû, dj'a volë doner on bètch à lë p'tête Lisa, èle m'avot aîdi po rabotner m' këlote quand' dj'avo sti pëchi. Lë Ma Seûr a rademint acourë po nos sèparer, dj'a bén vèyë qu'èlle èstot mwaîje. D'ayeûrs, èlle a

bèrdèlé sè l' paradès èt sè l' infîêr po l' èûre què d' mèrève dè l' avant prandjêre . Djè li a d' mandé sè lès tchéns èto alîn' en-infîêr, pace qu' èl arève co bèn qu' nosse Diane, vént m' doner on rêde còp linwe èt ralétchi m' massale...



Djè so-st-en prëmène anéye, adlé l' maisse Vanôve : c'èst lè qu'a lès trwès prëmènès anéyes. Mè frère Armand, qu'a quatre ans d' pès qu' më, est dins l' place da costé adlé l' maisse Dèpont avou lès trwès-ôtès-anéyes. Nosse man li a bèn r'commandé dè rawaiti à më. Mins volà, Armand n' vwèt ni volti lè scole, on djoû sè deûs, è d'mande po-z-aler pèchi... èt on n'èl rëvwèt pès dè l'

djoûrnéye. On côp, on lë r'trove dins l' chavéye dau tiyou, on-ôte, ë racôurt adlé s' marëne Madelin.ne quë d'mère au Saut. Nos n'èstans qu'a trwès dins noste anéye, lë Maurice « Bouboune » Albert, lë Marcel « Postëlârd » Vanderhulst, èt më lë Jacky « Barbi » Desmet. Nos-avans lès chïs places dè l' prëmi banc po nos trwès. Come djë so lë pës stokasse dè trwès, lë maïsse à fait passer lès deûs-ôtes dëvant më, ës sont pës spëtants. Ça fait quë dj' so jësse àstoke dë lë stove. Djë n'a ni à m' plinde, djë scri mès lëgnes dë « i » èt dë « u » come ë faut à l' crôye së m'-y-ardwësse, èt dj'a rade yë attrapé l' tour po lès cârkëls. Së djë n' so ni prëmi, ni daîrën, djë sèrè seûr deûzyin.me ou avant daîrën , èt dj'arè todë mès pîds au tchond !

Dëvant, adlè lès « Ma Chère Soeur », djë rëspondëve co bën è walon, mins vaïcë : djë so dobe, lë maïsse në vout pës. Djë vwè bën qu' ça li va lon dë m' margougni quand' djë stëtche on mot è walon dins mès rësponses. Èt à chaque côp, djë vwè sès lèpes quë s' findenèt èt sès-ouy fën bënauges. Dëvant lès-ôtes-ëfants, ël èst bën oblëdji dë m' doner dës pûnëcions, mins lë lëddëmwïn, ë n' më d'mande jamais quë djë l'zi rapwate. /.../

Mélin.

*Vèladje dè nos parints,
Vèladje dè d' quand dj' èsto gamin.
A-dje djamb'lé sè vos pavéyes !
A-dje bèrôlé dins vos foncias !
À l' nîve, au solia, sè vos-ûréyes !*

Mélin.

*Ô, m' bia p'tèt vèladje !
Quates pètèts amias
Covés pa d'zos nosse blanc clotchi
Què pwate sè coq jèsqu'aus nûléyes.*

*A-dje vèyè ?
Nos stindéyes dè vèt', au mwès d' mây,
Nos pachès caflorès, avou l' bon timps,
Nos stindéyes dè scaugnes d'ous d' l'èsté.
Nos pawas dins lès chavéyes.*

A-dje sintè ?

*Lès fornéyes dè pwins cujant dins lès fors ;
Lès vénéyes èmacraler mès traus d' nez :
Sè ça sint lè stauve, c'est là qu'on vèke ;
Lè nwêr dè pouchêre, c'est qu'on bat lès din.réyes.*

A-dje ètindë ?

Lès ritchitchi-batisse-cowitche,

Lès coqs tchanter à mèsère avou l'èclème dè l' mârchau,

Lès tchéns bawyi après lès tch'vaus,

L'angélus què sone prandjêre !

A-dje sayi ?

Lès bonbons dè r'naud dins lès spènes,

Lès sècrés r'djètadjes sè lès sproutes,

Lès poumes cutes dins l' covèt.

Lès scaflotes dè nosse gâyi.

Vèladje dè nos cinsis

R'lèvés avou l' solia,

Boutant jèsqu'à l' vièspréye,

Sè leûs têres, sè leûs pîces.

Ardents dins leûs fîves,

Au solia, à l' plaive, à l' nîve.

Lè cè qu'a polè sok'ter on quârt avou zèls,

Stindë dins-on mèlia d' foûre,

Nè vos rovîyerè jamais pès !

Vèladje dè nos tâyeûs d' pîre !

A-dje ètindë lès sclats

Pèter pa d'zos vos masses !

Avoz vèyè nos blankès pîres

Tayîyes avou leûs chasses ?

Avoz vèyè nos blankès pîres

Què rabrèssenèt nos-intréyes,

Què moussenèt nos fènièsses,

Què sopwatenèt nos maujones ?

Avoz vèyè nos blankès pîres ?...

*A-dje chouté nos vis parints,
À l' chête, së l' pîre dè l' ëch
Au tîmps dè baloûjes !*

*A-dje chouté nos vis parints
Nos raconter dè fèrdin.nes
Au r'cwè, dins l' këlot !*

*Combén d' côps nos-ont-ës
Trin.né së nos sclèdes d'èfants,
Dins nos pès bias mousemints,
Së l' vôte dè l' mèsse dè maiyenait !...*

*Dès djous, dè mwès... dè-ans !
Què djè m' pormin.ne au lon,
Sins waire dè bon !*

*Dès djous, dè mwès... dè-ans !
Què dj' a mès niêrs ;
On keûr dè fiêr !...*

*Vairoz avou më à Mélin,
Po-z-i r'trover l' gout d' nosse pwin ?
Po-z-i r'ssayi l' tchaleûr dè nos djins ?*

*Nos-è mète plin lès-ouy, plin lès mwins...
Po fé frèm'ji nosse song,
Po ratraper nosse tièsse !...*

*Lè djou qu' nos-èrirans,
Nos r'pèdrans nos sclèdes d'èfants !*

Djè t' vwè volti, më p'tèt Mélin,

*On n' cause pès waire lè walon dins nosse Walonîye,
Èl èst tot jèsse bon à-z-aurder dins lès viserîyes.
Së place d'asteûre, c'è-st-au muséye Guggenheim.*

*Co saquantès djins què l' djaurgonenèt au Wisconsin,
One brèssîye què l' law'taiyenèt à Mélin :
Zèls èvôyes , ë sèrè spèpyi adlé Guggenheim.*

*Nos ârans pièrdë lès paroles da nosse mame ;
Véngt' ans ? Cénquante ? È sèrè djës,
C'èst nos racènes qu'on-arè pièrdë.*

*Mins më, djè nè l' rovîyerè jamais,
Jèsqu'à m' dairène blame,
Djè causerè come nosse mame.*

*On m' pèdrè quéquefîye por on dinosaure,
On d'mé-cougni, one bièsse à paurt,
Auyenéye dins l'aléye da Guggenheim...*

*Lè cë quë vos min.nerè, vos dirè :
« C'èst tot ç' quë d'mère dès Walons,
Audjoûrdë : ë n'a pèpont,*

*Së vos voloz co l' ètinde causer,
Vos d'vroz nachî po-z-è trover...
Quéquefîye bén qu'à Mélin,*

*Vos l'ètindroz co tchanter. »
« Compèdroz co s' tchanson,
À l' rakèlot dè Walon ? »
È vos dirè :*

*Djë t' vwè volti, më p'tèt Mélin,
Tote më djon.nèsse i è-st-au r'cwè,
Më dîros' bén ? Sés' bén poqwè ?
Pace què t' m'as bèrci dins tès brès !*

*Djë t' vwè volti, më p'tèt Mélin,
Lûrot-ë co lès sèpt' solias,
Lë plaîve tchaîrot co à sayas,
C'è-st-adlé twè què dj' so-st-au mia,*

*Bondjoû, frérot ! Bondjoû, gamin !
Vos v's-è sov'noz dè l' mai d' nosse man,
Vos v's-è sov'noz dè l' gout d' nosse pwin,
Quand' on d'mèréve co à Mélin !*

*Qu'on s'assayîve à prèstè l' pause,
À machi l' béré èt lès guèsses,
Avou nos p'tètès pougnes totes crausses,
Sayant d' aîdi à fé soperèce.*

*On-arot dèt come s'on d'jéve mèsse,
Vos v's-è sov'noz d' sès doucès djèsses,.
Qu'on avot co nos tayas dë wèsse !
Èt qu'on vèkéve co à Mélin !*

*Quand' on avot co nos bèlès croles,
Vos v's-è sov'noz d' sès doucès paroles,
Qu'èle dëjéve po nos rapauji
Quand' nos-èstîn' naujis.*

Combén d' côps avans-n' sémé lès wadjes,

*Fait dès loyéns avou dès twatches,
Satchi l' lacia au pés dès vatches,
Quand' on vëkéve co à Mélin.*

*Bondjoû, gamin, bondjoû, frérot !
Por më, ë m' chone quë dj' i so co,
Vos v's-è sov'noz dès tch'vaus d' nosse pa
Qu'ë faléve min.ner au cwârdia ?*

*Nos véyîn' volti lès stindéyes,
Sogni à r'laye po lès dinréyes,
Nos ascauchîn' totes lès chavéyes
Quand' on-asplanéve tot Mélin.*

*Tot ç' quë nosse pa nos a aprins,
Tot ç' quë nosse man nos a aprins,
C'èst d' travayî po l' lèddëmwin,
C'èst d' causer à môde dë djin.*

*Por më, tè d'meûres todë l' pës bia
Djë vou fé soyë qu'on tè l' dîye
Djë sèrè r'machi à t'-y-aurzîye,
Pa d'zeû nosse man, pa d'zeû nosse pa,*

*Au d' bout d' mès rôyes, djë m'ènn'irè avou m' lingadje,
Djë sèrè l' daîrén, djë wadje !...
Po lès daîrënès s'minces quë dj'arè sèmé,
Djë lairè m' place à qui mèchener...*

Morë po morë ?

Tant qu' nos-èstans come kë èt tch'mîje avou l' françès, tant qu' nos scrijans todë, rapôrt à ç' lingadje-là, comint voloz qu'on nos r'conèche, nos, lès Walons !

Më, m' walon, dj'èl vwè volti à 'nnè yèsse dësbautchi fén mwârt. C'èst l' lingadje dë mès pârints qu'on va mète è tère dëmwin, èt avou lë, nosse nom : Walon !

Lë chance quë n' avans audjourdë, c'èst qu' lès Flamins vol'nèt yèsse maïsse è leû maujone. Poqwè n' sèrîn' ni maïsse è l' nosse, èt lès Brëss'laires, è l' leûr !

À m' chonance, poqwè co s'astaurdji avou dës djins quë n'ont ni lès min.mès-édéyes quë vos ? On-èst jamais së bén qu' dins sès-ayèsses. Qu' ës chov'nèche dëvant leû-z-ëch, nos chovrans dëvant l' nosse, èt tot l' monde sèrè bënauje.

Po ça, ë faurè tuzer èt r'tourner nos mantches :

Satchi së l' min.me cwade tortos èchones, chakën' dë s' costé.

Lë mostrer.

Mostrer qu'on est capâbe.

Rëmète nos djins à scole : nos maïsses èt nos-èfants.

Lë fé soyë dins tos lès vëj' nauves, come amon nos-ôtes èt ni pa dës plâneûs quë passenèt pa d'zeûs vosse tièsse.

Rëmète au cwârdia dë nosse pëtèt djârdin, dës-omes, brâves èt onièsses, èt ni dës compeûs d'boûsse.

*Quand tot va mau ; ça n' sârot qu'aler mia,
mins, ë n'a pës à taurdji !*

Vî min.nadje.

Mayane Lëcoq :

Volà, nos-èstans co en brète, là d'djà on bon momint qu' ça trin.ne. Djë n' sé pës op ! Djë so-st-astantche ! Djë n' sé pës par èvou l'èdaumer. ë grûle, ë grûle... On l' pout Bén dîre quë cë n'èst ni pace qu'on marîye on djouweû d'armonëca qu'on danse tos lès djous.

Portant, ça s'avot së Bén èmantchi ; dj'a todë sti bèle. C'èst ni pace quë c'èst më quë vos l' dët ! Non.na ! Djë n'a waire tchandji, minme avou lès-ans, lès djins trovenèt quë dj'so todë ossë bèle quë d'vant. Èt po ça, lë-minme, ë n' pout ni aler conte !

Djèf Liyon :

Nos n' causîn' ni l' minme lingadje. Mins volà longtimp qu' nos nos antîn', èt nos avîn' lès minmès-ëdéyes. Dë s' costé come dè l' ménke, nos avîn' rëbouré tos lès galants : èt nos avans mètë l' pîd dins lë strëvîre.

Mayane Lëcoq :

Djë savo Bén qu'ë n'èstot waire pësant, lë, qu' n'èstot ni pës spës qu'on d'mé sorèt. È n'avot waire dë broques, mins dë m' costé ; dj'ënn'avo po deûs èt co po-

z-è fé !

Djèf Liyon :

Dj'a bouté à r'laye po-z-arëve à c' què n's-avans tos lès deûs. Èle pourot lachi l' brède, èt m' laiye fé à m' môde por on còp.

Mayane Lëcoq :

Come dj'èsto one miète nâwe sè lès bôrds, djè li avo minme laiye lès cwardias de l' bouÛsse èt djè l'a laiye fé à s' chonance.

Djèf Liyon :

Èle trove què djè li è d'mande bran.mint d' trop. Èle pourot d'djà r'conèche què c'èst grâce à mè, qu'èle n'a pès què s' bètch à drovè po qu' tot li tchaiye dèdins sins mau. Dj'a bau li d'mander qu'on faîye on còp lès comptes : kine !

Mayane Lëcoq :

È 'nn' a profété dès-anéyes au long. Vos l' dëvrîz veûy ; rècrauchi come on nourén. È vos fréve veûy lè lène è plin prandjère on djoû d' plaîve ! Tot compte fait, asteûre, vo-m-là tote dëscaurléye. È dèt què dj' m'amûse. È raconte què dj' so payasse. È cause de volè pèter èvôye èt de r'prinde nosse crapôde avou lè ! Faut ni qu'èl î touche à onk de sès tch'vias da lèye ; sés' ! Mins taudje one miète, Godom ! Sè faut aler jèsqu'à là, è troverè à qui causer !

Djèf Liyon :

Dj'èl sé bén qu'èlle èst co bèle èt qu'èlle a tote lè place po sè r'tourner. Mins c'èst todè mè què boute po

sès canetias, èt c'èst lèye què r'ssatche lès canadas foû dè l' bûse. Avou nosse crapôde, c'èst tot fén parèy ; faurot qu' dj'èl laîye fé à s' môde èto. Dèdjà qu'èle mè costéye lès-ouy dè l' tièsse, cètèlla ! Tos sès galants acour'nèt autou d' lèye come sè sèrîn' à leû maujone. Ambècieûse qu'èlle èst ! Mins rote sayi dè fé dè bûre avou d' l'aiwe, twè !? Sè djè n' rawaite ni à ça asteûre, tot va toûrner à mèsére !

Mayane Lëcoq :

Dj'a bau li arôyi saquants tchandjemints, po qu'on pouye sayi dè mwin.ner nosse tchaurd au mia : rén d'djà qu' po l' bèn d' nosse crapôde. È n' mè choûte pès ! È li faut tot ! Ça n'èst nérén ! È prind l' trau dè s' kè por one pwate d' èglîje !

Djèf Liyon :

È n'a pès qu'one saqwè què m' rastént ; c'èst lès caurs què ça va co coster s'on chète lè nèk. C'èst ni co ça què va racléré l' brouwèt ! Èle sè mèt è l' tièsse qu'èle satch'rot bèn s' plan tote seûle. Qu'è n'a bèn on vwèsén qu'èle vairè copler : èl a d'djà v'nè aus novèles cèt'la, po veûy sè n' dèmèrrot ni on-oucha à spèpyi.

Mayane Lëcoq :

Èl a tot rovi dè ç' què dj' li a apwârté l' djoû d' nosse bankèt. Ça fait t't-à l'eûre dépès d'on-an qu'on n' sè cause pès qu'au d' trèviès dè l' paurli qu' nos avans sti trover. Lè, c'èst m' choûter èt n' rén dîre ! À s' chonance, è faurot qu'on sè r'causerot.

Dèf Liyon :

Lè paurli qu' nos-avans sti trover : on bèrdèlaud qu'ë n' siève à rén èt quë profëte dë nos liârd. Djë li a d'djà dèt, mins ë vourot co Bén qu' on së r'causerot.

Mayane Lëcoq :

Djë m' va co sayi on côp po veuy s'ë-n-a ni moyén d' nos raclaper.

Djèf Lëcoq :

Djë m' va co sayi on côp po veuy s'ë n'a ni moyén dè r'mète nosse tchaur së lès rayes, mins ça m' chonerot drole : à anter one lèche on-atrape sès pûs !

Â ! Nos-avans rovi d' vos l' dîre : nosse min.nadje c'èst lès « Liyon-Lëcoq » èt nosse crapôde c'èst Janëkëpisse.

D'oyë vèyë volti...

One eûre,
Quéquefiye co mwins',
One eûre po veûy volti...

Dès-eûres, on-z-è dëspïnse
À nonsyince,
Vos n' sariz ?

Vos n' sariz m'è d'ner one ?
Èt nos-irîn' èchone
Coude lë solia së lès nûlias
Èt coude lès fleûrs
Èt co l' bouneûr
Qu'on-ïrot spaude à tous lès vints

Rén qu'one eûre...
On s'èdâmerot contints
D'oyë vèyë volti.

On a co tchandji lès eûres !

Audjourdë, djë so come one rabanêre : èle në pout ni yèsse tos lès djous à bia timps.

Dandjèreû quë dj' n'arè ni waiti m' boutroule en më r'lèvant.

On a co tchandji lès eûres. ! Èt avou l'âdje, djë n' sopwate pès fwârt lès tchandj'mints.

Timps d' nosse man, - quë l' Bon Dië waîte bén à lèye, asteûre qu'èlle è-st-astauv'léye avou lë - Timps d' nosse man dë-dj', èle nos d'djéve :

« Po bén yèsse rëpwâsé, ë vos faut dârmë vos yut eûres, èt lès eûres dë d'vant maiyenait compt'nèt à dobes, alez lès èfants, au chlop ! »

Èt come ë n'avot co pont d' tévé adon, èt qu' lès chîjes èstîn' faites po lès grandès djins raconter leûs bièstrîyes, nos nos r'trovîn', më frère èt më, dins nosse grand lèt, tos lès djous po yut eûres au pès taurd.

Èl èstot on miète pès djon.ne, mins aviè 5 ans, ë profèteve pès rade quë më, èt on nos përdéve co bén po-r-one djèrmale.

È-n-avot one plantche quë s' dëstatchîv' à l'

tièsse dè nosse lét. Nos lè r'ssatchîn', passer l' bôrd dè l' linçou dè d'zeû, èt r'claper l' plantche à s' place. Nosse lét dè v'néve one tante d' Indyin. Tos lès djous, nos trovîn' on plan po nosse plaijè... Quand m' frère më pèrdéve pa l'orâye dè l' drwète mins, èt tchoûki sè gauche pônçe inte sès dins, ça v'léve dîre qu'ël èstot d'djà dins sès sondjes...

Vola comint qu' nosse man nos-a abëtouwer : aler dârmè tot timpe èt nos r'lèver tot timpe èto : lè cwade bèn r'tinkîye po tote lè djoûrnéye.

Mins l' djou d'audjourdè, avou dè télès-abëtèdes, èt à l' copète, l'eûre qu'on vos ravançîye aviè l' fin dè mwès d' maus' ; vos-v-là dins vosse lét avou lès pôyes, èt po trwès-eûres dè matén, c'èst vos qu'èst près' à-z-aler fé r'lèver l' coq !... Èt au d' dèzeûs co trwès eûres à tchëcter pa d'zo vos plèmes dè canârd dèvant d' polè vos r'lèver... A grûler sèr-one èmantchûre dè fôn què vos machère on laid vèsadje po tote lè djournéye.

Por më ça n' siève qu'à ça, lè tchandj'mint dèseûres !

Mès Mwins

*Mès mwins
Ont r'trové dès sov'nances.
Èles dèssën'nèt vosse cougne.
Èles cour'nèt sè vos foumes.*

*Mès mwins :
Quë vos n'i sondj'roz ni,
Crèvaudéyes, pèsantes,
Èt sè lèdjêres à l'fïye,*

*Mès mwins
Vairons sèmer dès frëmjons,
Vairont vos r'blankë,
Come au prëmi djou !*

On dèt qu' dj'èl vwè volti branmint d' trop.

*Cë fème-là, quë rafurléye avou dës mossias,
Lès afèlantès scrabîyes sèméyes
Së m' vôle.*

*Cë fème-là , quë r'fache avou dës tchabaréyes
Lès dësgostantès colèbales
Dë mès gayoles.*

*Cë fème-là, quë m' drove lès fënièsses
Po n' ni m' rasténre, më ténre è sère
Dins s' prîjon.*

*Cë fème-là, que sofèle tote së tchaleur
Po tchandji mès nwêrès nuléyés
À tinrès roséyes.*

*Cë fème-là, quë rabroke todë l' prëmène,
Drove, tot laudje, lë baurîre dë s' djârdén,
Come sès brès.*

*Djë n' li dirè jamais assez :
« Maman! »*

Vièspréye.

*L'esté m'a lachi.
Djè rote à vosse mèsère.
Djè n'a pès l' timps
Dè baloûj'ner à campagne,
Dè choûter brûtyi lès mouchons.*

*Më dos clincîye
Së mès frawes dë djon.nèsse,
Rëpèdrè-dj' më baston
Po raler à mèsse ?*

*Ël èst bén yète,
Lë timps dës cèrîjes.
Totes lès naîts
Lë solia bache.
Rëskèpîyerè-t-ë co d'mwin
Franc come dëvant ?*

*Djè n'a ni peû
D' l'ëch au laudje
Së mès-ëviêrs.
Dj'a on guèrni
Plin tot laudje
Avou nos capougnadjes !*

*Vos avoz sti l' fleûr èt l' frût
Dins mès naîts d' fén bètch.
Vos d'mèrez m' solia
À l'intréye dè l'ëviêr :
Lè stwèle què wîye së mès sondjes.*

*Rëdëjoz-m'èl : « Djè t' vwè volti ! »
Por vos : djè rataqu'rè on novia royon !*

*Djè r'passerè lès viyès pautes au diâle
Po n' rasténre què lès bounès s'minces
Què dj' sèm'rè d'mwin
Së m' daîrén boni.*

*Djè n' vou pès scrîre totes mès cwachûres.
Mins djè m' bat'rè tant, què dj' gangn'rè.
Dj'a dandji qu'on m' laiye au rcwè :
Lè brouyîye aiwe së raclérè todè.
Èt pa d'zo m' kû,
Djè n'a pès qu'on keûr byin trop tène !*

*Quand' lè djoû bache,
Djè cache après lè stwèle
Què blam'téye co dins vos-ouy.*

*Mè vèkairîye,
C'èst l' poume què vos avoz mètè dins mès mwins.
Djè n' pèle què lès pèlakes d'ayîr
Po n' rasténre què l' mêtan
Què sopwat'rè l' djaléye.*

*Èt, s'è d'meûre
One sètwèle à skèpyi,
Ça sèrè l' nosse !*

Mauj'ni.